



Komunikadu Imprensa

Periodu : Feveiru 2011

Publikasaun : 08 Feveiru 2011

JSMP Hala'o Treinamentu iha Suco Aisirimou, Distritu Aileu

Iha lora 04 fulan Feveiru 2011, *Judicial System Monitoring Programme* JSMP liu husi Unidade Apoiu Legal ba Vítima (*Victim Support Service*) ka VSS, hala'o treinamentu ba autoridade komunitária, hanesan Xefe Suco, Xefe Aldeia, Konsellu Suco, Rede Feto, representante joventude mane no feto, Komandante VPU Distritu Aileu, no comunidade balun. Treinamentu ne'e hetan apoiu husi administrador Sub-Distritu Aileu, hodi loke treinamentu iha lora refere. Partisipante sira hamotuk ema nain tolu nulu resin lima (35), kompostu husi mane rua nulu resin walu (28) no feto ema nain hitu (7).

Matéria treinamentu konabá Kódigu Penál no Kódigu Prosesu Penál husi perspektiva vítima violénsia bazeia ba jéneru; no Dekretu de Lei Nu. 7/2010 Lei Kontra Violénsia Doméstika. Matéria treinamentu ne'e mos inklui Konvensaun Internasional sira, partikularmente konabá CEDAW no Konvensaun Direitu Labarik nian. Aleinde ne'e, kobre mos artigu balun husi Lei Nu. 3/2009 konabá Lideransa Komunitária, ne'ebé defini mos kompetensia Xefe Suco no konsellu suco konabá promove hari mekanismu atu prevene violénsia doméstika, inklui mós knaar ka funsaun husi Ajente Prosesual no Autoridade Judisiaria. Liutan, JSMP/VSS esplika mos ba partisipante sira konabá prosesu kazu krime no kazu sivil tuir sistema justisa formal iha Timor Leste.

Direitór JSMP, Luis de Oliveira Sampaio, haktuir katak treinamentu ida ne'e realiza iha Suco refere ho objetivu atu hasa'e kuiñesementu lider komunitária, grupu feto, representante joventude feto no mane, inklui comunidade konabá prosedimentu sistema justisa formal iha Timór Léste, liu-liu kazu violénsia bazeia ba jéneru. Iha parte seluk mos bele reduz siklus violénsia doméstika iha comunidade nia le'et, nu'udar sidadaun ne'ebé respeitu ba prinsipiu Estadu Direitu no iguldade jéneru.

Tuir JSMP/VSS ninia observasaun ba comunidade iha suco refere hare katak, maske violénsia doméstika nu'udar krimi ho natureza públiku, tuir Lei Kontra Violénsia Doméstika, maibe iha realidade ba moris comunidade nia kuiñesementu sei minimu ba lei ne'e rasik. Tanbá tuir lider komunitaria sira nia hanoin katak, kuandu violénsia doméstika ne'ebé la grave no vítima rasik hakarak atu rezolve familia, dala barak mos kazu hirak ne'e rezolve deit iha nivel familia. Maibe liu husi treinamentu ne'e, lider komunitaria sira mos hamutuk ho comunidade komesa hatene dadauk ona prosesu ba

kazu violénsia doméstika ne'ebé kobre violénsia fízika, psikolojika, seksual, no violénsia ekonomika.

JSMP espera katak ho treinamentu ida ne'e bele ajuda lider komunitáriu, grupu fetu, representante joventude fetu no mane, no mos comunidade atu bele iha kuiñesementu hodi halo prevensaun, protesasaun, no tulun ba vítima sira husi violénsia bazeia ba jéneru hodi asesu ba sistema justisa formal.

Treinamentu ne'e realiza atraveza ho apoiu finaseiru husi Governu Australia liu husi Justice Facility.

Atu hetan infórmasaun kle'an favor kontaktu:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883